



**ՀԱՅԱՍՏԱՆՈՒՄ ՍՈՎԵՏԱԿԱՆ ԿԱՐԳԵՐԻ ՀԱՍՏԱՏՄԱՆ
ՋԱՌԱՍՈՒՆԵՐԿՈՒԵՐՈՐԴ ՏԱՐԵՂԱՐՁԻՆ ՆՎԻՐՎԱԾ
ՀԱՆԴԻՍՈՒԹՅՈՒՆ ՄԱՅՐ ԱԹՈՌՈՒՄ**

Նոյեմբերի 29-ին, հինգշաբթի, առավոտյան ժամը 12-ին, Մայր Տաճարում, Իջման Ս. Սեղանի առաջ, տեղի է ունենում Հայաստանում սովետական կարգերի հաստատման 42-րդ տարեդարձի առթիվ Կառավարական մաղթանք:

Հանդիսության նախագահում է Վեհափառ Հայրապետը:

Գոհարանական աղոթքին ներկա են Մայր Աթոռի միաբանները, Հոգևոր ճեմարանի դասախոսական կազմն ու ուսանողությունը, Մայր Աթոռի պաշտոններությունը և բազմաթիվ հավատացյալներ:

Կառավարական մաղթանքից հետո, ժամը 1-ին, Հոգևոր ճեմարանի հանդիսասրահում կազմակերպվում է գրական-գեղարվեստական ցերեկույթ, Վեհափառ Հայրապետի բարձր նախագահության տակ, նվիրված օրվա ազգային մեծ տոնի նշանակության:

Հանդիսության ներկա էին նաև Հայկական ՍՍՌ Մինիստրների Սովետին առընթեր Հայ Եկեղեցու գործերի խորհրդի նախագահի տեղակալ Ս. Հովհաննիսյանը, Խաղաղության պաշտպանության ռեսպուբլիկական կոմիտեի քարտուղար տիկին Խաչատրյանը:

Հանդիսությունը բացվում է Հայկական ՍՍՌ Պետական Հիմնի նվագով:

Այնուհետև Հոգևոր ճեմարանի վերատեսուչ գերաշնորհ Տ. Հայկազուն արքեպիսկոպոս Աբրահամյանը հանդես է գալիս նոյեմբեր 29-ի պատմական և ազգային նշանակության նվիրված բացման խոսքով:

Հայաստանում սովետական կարգերի հաստատման 42-րդ տարեդարձին նվիրված քովանդակալից ճառով հանդես է գալիս Հոգևոր Ճեմարանի գրարար լեզվի դասախոս Ս. Անթույանը:

Հանդիսության ընթացքում գործադրության է դրվում նոյեմբեր 29-ի խորհուրդը նշող գեղարվեստական հայտագիր, բաղկացած խմբերգերից, մեներգերից և արտասանություններից:

Հոգևոր ճեմարանի ուսանողական երգչախումբը կատարում է «Սաղկիր ազատ իմ Հայրենիք» և «Լեռների ուսին» խմբերգերը: Գ դասարանի ուսանող Գ. Բունիսթյանը արտասանում է Ս. Կապուտիկյանի «Իմ Հայաստան»-ը, իսկ Բ դասարանի ուսանող Ս. Բողոյանը՝ Հ. Թումանյանի «Հայրենիքի» հետ»-ը:

Հանդիսության ժամանակ խոսք է առնում Խաղաղության պաշտպանության ռեսպուբլիկական կոմիտեի քարտուղար տիկին Խաչատրյանը և խանդավառ ծափերի մեջ, հանուն կոմիտեի շնորհավորելով, պատվոգրեր է հանձնում գերաշնորհ Տ. Սահակ արքեպիսկոպոս Տեր-Հովհաննիսյանին և գերաշնորհ Տ. Հայկազուն արքեպիսկոպոս Աբրահամյանին՝ խաղաղության պաշտպանության ի նպաստ նրանց կատարած աշխատանքների համար:

Այնուհետև ողջույնի և օրհնության խոսք է ասում Վեհափառ Հայրապետը ազգային-պետական մեծ տոնի 42-րդ տարեդարձի առթիվ:

և շնորհավորելով պատվոգրերի արժանացած գերաշնորհ Տ. Սահակ և Տ. Հայկազուն արքեպիսկոպոսներին, նշում է, որ այդ պատվոգրերը նաև Մայր Աթոռ Ս. էջմիածնի խաղաղասիրական գործունեության գնահատությունն են:

«Մենք,— եզրակացնում է վեհափառ Հայրապետը,— այսուհետև էլ կանգնած կլինենք միշտ, մեր հոգևորականներով և հավատացյալ ժողովրդով, խաղաղության պաշտպանության դիրքերում, որովհետև քրիստոնեու-

թյունը խաղաղության առաջնությունն է մարդկանց մեջ և աշխարհի վրա»:

Ապա Նորին Ս. Օծությունն օրհնում է Հայրենի աշխարհն ու աշխատասեր Հայ ժողովրդին, բարեմաղթելով, որ խաղաղություն լինի համայն աշխարհում և բոլոր Հայ երգիկների տակ:

Հայաստանում սովետական կարգերի հաստատման 42-րդ տարեդարձին նվիրված հանդիսությունը վերջանում է խմբովին երգված Տերունական աղոթքով:

